

四庫全書

史部

欽定四庫全書

前漢書卷七十八

漢 蘭 臺 令 史班 固撰

唐正議大夫行秘書少監琅琊縣開國子顏師古注

蕭望之列傳第四十八

蕭望之字長倩東海蘭陵人也

師古曰近代譜謀妄相託附乃云望之蕭何之

後追次昭穆流俗學者共祖述焉但鄴侯漢室宗臣功高位置子孫胤緒具詳表傳長倩儒達學名節並隆博覽古今能言其祖市朝未變年載非遙長老所傳耳目相接若其實承何後史傳寧得弗詳漢書既不叙論

後人焉所取信不然之事斷可識矣 徙杜陵家世以田為業至望之好學

治齊詩事同縣后倉且十年以令詣太常受業

如淳曰令郡國

官有好文學敬長肅政教者二千石 復事同學博士白

奇

師古曰常同於后倉受業而奇後為博士

又從夏侯勝問論語禮服

師古曰禮

之喪服也京師諸儒稱述焉是時大將軍霍光秉政長史丙

吉薦儒生王仲翁與望之等數人皆召見先是左將軍

上官桀與蓋主謀殺光光既誅桀等後出入自備吏民

當見者露索去刀兵兩吏挾持

師古曰索搜也露形體而搜也索音山客反

望之獨不肯聽自引出閤曰不願見吏牽持匈匈光聞

之告吏勿持望之既至前說光曰將軍以功德輔幼主

將以流大化致於洽平

師古曰令太平之化通洽四方也○宋祁曰注文通字疑是遍

字是以天下之士延頸企踵爭願自効以輔高明今士

見者皆先露索挾持恐非周公相成王躬吐握之禮致

白屋之意

師古曰周公攝政一沐三握髮一飯三吐哺以接天下之士白屋謂白蓋之屋以茅覆之

賤人所居蓋音合○宋祁曰吐握字疑是捉字

於是光獨不除用望之而仲翁

等皆補大將軍史三歲間仲翁至光祿大夫給事中望

之以射策甲科為郎

師古曰射策者謂為難問疑義書之於策量其大小署為甲乙之科

列而置之不使彰顯有欲射者隨其所取得而釋之以知優劣射之言投射也對策者顯問以政事經義令各

對之而觀其文辭定高下也

署小苑東門候

師古曰署補署也門候主候時而開閉也仲

翁出入從倉頭廬兒

師古曰皆官府之給賤役者也解在貢禹傳○宋祁曰貢禹傳常是

鮑宣傳

下車趨門傳呼甚寵

師古曰趨讀曰趣趨嚮也下車而嚮門傳聲而呼侍從者

甚有尊寵也○宋祁曰注文尊寵下疑有之榮字

顧謂望之曰不肯錄錄反抱

關為

師古曰錄錄謂循常也言望之不能隨例搜索以違悟執政不得大官而守門也

望之曰

各從其志後數年坐弟犯法不得宿衛免歸為郡吏及

御史大夫魏相

○宋祁曰浙本無及字

除望之為屬察廉為大行

治禮丞時大將軍光薨子禹復為大司馬兄子山領尚

書

師古曰霍山去病之孫今云兄子者轉寫誤爾

親屬皆宿衛內侍地節三年

夏京師雨雹望之因是上疏願賜清閒之宴口陳災異

之意

師古曰問詩曰問

宣帝自在民間聞望之名曰此東海蕭

生邪下少府宋畸問狀

師古曰畸音居宜反

無有所諱望之對以

為春秋昭公三年大雨雹是時季氏專權卒逐昭公鄉

使魯君察於天變宜亡此害

師古曰鄉讀曰嚮亡讀曰無

今陛下以

聖德居位思政求賢堯舜之用心也然而善祥未臻陰

陽不和是大臣任政一姓擅執之所致也附枝大者賊

本心私家盛者公室危

師古曰本心樹之本株也

唯明主躬萬機

宋

祁曰一木作躬親浙本無

選同姓舉賢材以為腹心與參政謀令公

卿大臣朝見奏事明陳其職以考功能如是則庶事理

公道立姦邪塞私權廢矣對奏天子拜望之為謁者時

上初即位思進賢良多上書言便宜輒下望之問狀高

者請丞相御史

師古曰望之以其人而言之狀請于丞相御史或以奏聞即見超擢○劉奉世

曰頗非也高者則令丞相御史試事次者則令中二千石試事歲滿各以狀聞誤斷其文爾劉敞說同

次

者中二千石試事滿歲以狀聞

師古曰試令行其所言之事或以諸它職事試

之下者報聞或罷歸田里所白處奏皆可

師古曰當主上之意也

累遷諫大夫丞相司直歲中三遷官至二千石其後霍

氏竟謀反誅望之寢益任用

師古曰寢漸也

是時選博士諫大

夫通政事者補郡國守相以望之為平原太守望之雅

意在本朝遠為郡守內不自得乃上疏曰陛下哀愍百

姓恐德化之不究

師古曰究竟也謂周偏於天下

悉出諫官以補郡吏

所謂憂其末而忘其本者也朝無爭臣則不知過國無

達士則不聞善

師古曰達士謂達於政事也

願陛下選明經術溫故

知新通於幾微謀慮之士以為內臣與參政事諸侯聞

之則知國家納諫憂政亡有關遺若此不怠成康之道

其庶幾乎

師古曰周成康二王致太平也○宋祁曰乎一作矣

外郡不治豈足憂

哉書聞徵入守少府宣帝察望之經明持重論議有餘

材任宰相

師古曰任堪也

欲詳試其政事復以為左馮翊望之

從少府出為左遷恐有不合意即移病

師古曰移病謂移書言病一曰

以病而移居

上聞之使侍中成都侯金安上諭意曰所用皆

更治民以考功

師古曰更猶經歷也音工衡反

君前為平原太守日淺

故復試之於三輔非有所聞也

師古曰所聞謂聞其短失

望之即視

事是歲西羌反漢遣後將軍征之京兆尹張敞上書言

國兵在外軍以夏發隴西北安定以西吏民並給轉

輸田事頗廢素無餘積雖羌虜以破來春民食必乏窮

辟之處買亡所得

師古曰辟讀曰僻

縣官穀度不足以振之

師古

曰度音徒各反

願令諸有臯非盜受財

○宋祁曰浙本改財作賕

殺人及犯

法不得赦者皆得以差入穀此八郡贖罪

師古曰差次也八郡即隴

西以北安定以西

務益致穀以豫備百姓之急事下有司望之

與少府李彊議以為民函陰陽之氣

師古曰函與舍同也○宋祁曰注未

也當刪

有好義欲利之心在教化之所助堯在上不能去

民欲利之心而能令其欲利不勝其好義也雖桀在上不能去民好義之心而能令其好義不勝其欲利也故堯桀之分在於義利而已道民不可不慎也

師古曰道讀曰導

今欲令民量粟以贖罪如此則富者得生貧者獨死是

貧富異刑而法不壹也

○宋祁曰壹或作一

人情貧窮父兄因執

聞出財得以生活為人子弟者將不顧死亡之患敗亂

之行以赴財利求救親戚一人得生十人以喪如此伯

夷之行壞公綽之名滅

師古曰公綽魯大夫孟公綽也論語稱孔子曰若滅武仲之智

公綽之不欲卞莊子之勇冉求之藝文之以禮樂可以為成人矣

政教壹傾雖有周召

之佐恐不能復

師古曰召讀曰邵復扶目反

古者臧於民不足則取

有餘則予詩曰爰及矜人哀此鰥寡

師古曰小雅鴻鴈之詩也矜人可哀

矜之人謂貧弱者也言王者惠澤下及哀矜之人以至鰥寡

上惠下也又曰雨我公

田遂及我私

師古曰小雅大田之詩也言衆庶喜於時雨先潤公田又及私田是則其心先公後

私雨于具反○宋祁曰注文字上常有音字

下急上也今有西邊之役民失

作業雖戶賦口斂以贍其困乏

師古曰率戶而賦計口而斂也

古之通

義百姓莫以為非以死救生恐未可也

師古曰子弟竭死以救父兄令

其生也

陛下布德施教教化既成堯舜亡以加也今議開

利路以傷既成之化臣竊痛之於是天子復下其議兩

府丞相御史以難問張敞敞曰少府左馮翊所言常人

之所守耳昔先帝征四夷兵行三十餘年百姓猶不加

賦而軍用給今羌虜一隅小夷跳梁於山谷間漢但令

臯人出財減臯以誅之其名賢於煩擾良民橫興賦歛

也

師古曰橫音胡孟反

又諸盜及殺人犯不道者百姓所疾苦也

皆不得贖首匿見知縱所不當得為之屬議者或頗言

其法可蠲除

師古曰以其罪輕而法重故常欲除此科條

今因此令贖其便

明甚何化之所亂甫刑之罰小過赦薄罪贖

師古曰呂侯為周穆

王司寇作贖刑之法謂之呂刑後改為甫侯故又稱甫刑也

有金選之品

應劭曰選音刷金銖

兩名也師古曰音刷是也字本作銖銖即銖也其重十一銖二十五分銖之十三一曰重六兩呂刑曰墨辟疑

赦其罰百錢劓辟疑赦其罰惟倍刑辟疑赦其罰倍差
宮辟疑赦其罰六百錢大辟疑赦其罰千錢是其品也

所從來久矣何賊之所生敞備阜衣二十餘年

如淳曰雖有五

時服至朝皆著阜衣

嘗聞罪人贖矣未聞盜賊起也竊憐涼州被

寇方秋饒時民尚有飢乏病死於道路况至來春將大

困乎

○宋祁曰大字上疑有不字

不早慮所以振救之策而引常經

以難恐後為重責常人可與守經未可與權也敞幸得

備列卿以輔兩府為職不敢不盡愚望之彊復對曰先

帝聖德賢良在位作憲垂法為無窮之規永惟邊竟之

不贍

師古曰惟思也竟讀曰境其下亦同

故金布令甲曰

師古曰金布者令篇名也其上

有府庫金錢布帛之事因以名篇令甲者其篇甲乙之次

邊郡數被兵離飢寒

師古曰離

遭天絕天年父子相失令天下共給其費

師古曰同共給之也自此

以上令甲之文固為軍旅卒暴之事也

師古曰卒讀曰猝言此令文專為軍旅猝暴而

施設○宋祁曰注文疑有之字

聞天漢四年常使死罪人入五十萬錢

減死罪一等豪彊吏民請奪假貨

師古曰貨音上得反

至為盜賊

以贖罪其後姦邪橫暴羣盜並起

師古曰橫音胡孟反

至攻城邑

殺郡守充滿山谷吏不能禁明詔遣繡衣使者以興兵

擊之

師古曰軍興之法也○宋祁曰浙本無興字劉攽曰當云以軍興兵擊之

誅者過半然

後衰止愚以為此使死罪贖之敗也故曰不便時丞相

魏相御史大夫丙吉亦以為羌虜且破轉輸足相給

遂不施敞議望之為左馮翊三年京師稱之遷大鴻臚

先是烏孫昆彌翁歸靡因長羅侯常惠上書

師古曰昆彌烏孫之

王號也翁歸靡其人名也

願以漢外孫元貴靡為嗣得復尚少主

蘇林

曰宗室女也

結婚內附畔去匈奴詔下公卿議望之以為烏

孫絕域信其美言萬里結婚非長策也天子不聽神爵

二年遣長羅侯惠使送公主配元貴靡未出塞翁歸靡
死其兄子狂王背約自立惠從塞下上書願留少主敦
煌郡惠至烏孫責以負約因立元貴靡還迎少主詔下
公卿議望之復以為不可烏孫持兩端亡堅約其效可
見前少主在烏孫四十餘年恩愛不親密邊境未以安
此已事之驗也今少主以元貴靡不得立而還信無負
於四夷此中國之大福也少主不止繇役將興其原起
此天子從其議徵少主還後烏孫雖分國兩立以元貴

靡為大昆彌漢遂不復與結婚三年代丙吉為御史大夫五鳳中匈奴大亂議者多曰匈奴為害日久可因其壞亂舉兵滅之詔遣中朝大司馬車騎將軍韓增諸吏富平侯張延壽光祿勳楊惲太僕戴長樂問望之計策望之對曰春秋晉士匄帥師侵齊聞齊侯卒引師而還

君子大其不伐喪

師古曰士匄晉大夫范宣子也春秋公羊傳襄十九年齊侯環卒晉士匄

帥師侵齊至穀聞齊侯卒乃還還者何善辭也大其不伐喪也

以為恩足以服孝子誼

足以動諸侯前單于慕化鄉善稱弟

蘇林曰弟順也師古曰鄉讀曰嚮弟

音悌○劉奉世曰漢興匈奴嘗約為兄弟此弟直白謂為弟耳遣使請求和親海內欣

然夷狄莫不聞未終奉約不幸為賊臣所殺今而伐之是乘亂而幸災也彼必奔走遠遁不以義動兵恐勞而無功宜遣使者弔問輔其微弱救其災患四夷聞之咸貴中國之仁義如遂蒙恩得復其位必稱臣服從此德之盛也上從其議後竟遣兵護輔呼韓邪單于定其國是時大司農中丞耿壽昌奏設常平倉上善之望之非

壽昌

師古曰此望之不知權道

丞相丙吉年老上重焉望之又奏言

百姓或乏困盜賊未止二千石多材下不任職三公非

其人則三光為之不明今首歲日月少光

師古曰首歲歲之初首謂

正月也咎在臣等上以望之意輕丞相

師古曰言三公非其人又云咎在臣

等是其意毀丞相

乃下侍中建章衛尉金安上光祿勳楊惲御

史中丞王忠并詰問望之

師古曰三人同共問之

望之免冠置對

天子繇是不說

師古曰繇讀與由同說讀曰悅

後丞相司直繇延壽

師古

曰繇音婁

奏侍中謁者良使承制詔望之望之再拜已良與

望之言望之不起因故下手

蘇林曰伏地而言也

而謂御史曰良

禮不備故事丞相病明日御史大夫輒問病朝奏事會

庭中差居丞相

○宋祁曰南本庭作廷下同

後丞相謝大夫少進揖

今丞相數病望之不問病會庭中與丞相鈞禮

師古曰不為前

後之差也

時議事不合意望之曰侯年寧能父我邪

服虔曰寧能與

吾父同年邪○劉攽曰言侯年雖高寧能為我父邪不足敬也劉奉世曰此直謂其安能為我之父輕之之辭

知御史有令不得擅使望之多使守史自給車馬之杜

陵護視家事

如淳曰漢儀注御史大夫史員四十五人皆六百石其十五人給事殿中其餘三十

人留守治百事皆冠法冠師古曰自給車馬者令其自乘私車馬也

少史冠法冠為妻先

引蘇林曰少史曹史之下者也文穎曰先
引謂導車前○宋祁曰注未當添也字又使賣買私

所附益凡十萬三千師古曰使其史為望之家有所賣
買而史以其私錢增益之用潤望

也案望之大臣通經術居九卿之右師古曰
石上也本朝所仰

至不奉法自修踞慢不遜攘師古曰攘
古讓字受所監臧二百

五十以上師古曰二百五十以上者當時律令坐罪
之次若今律條言一尺以上一疋以上矣請

逮捕繫治上於是策望之曰有司奏君責使者禮遇丞

相亡禮廉聲不聞教慢不遜師古曰教
讀口俄亡以扶政帥先

百僚君不深思陷于茲穢朕不忍致君于理使光祿勳

憚策詔左遷君為太子太傅授印其上故印使者

師古曰使

者即謂楊憚也命憚授太傅印而望之以大夫印上於憚

便道之官君其兼道明孝

正直是與帥意亡讐靡有後言

師古曰讐古愆字後言謂自申理

望之

既左遷而黃霸代為御史大夫數月間丙吉薨霸為丞相霸薨于定國復代焉望之遂見廢不得相為太傅以論語禮服授皇太子初匈奴呼韓邪單于來朝詔公卿議其儀丞相霸御史大夫定國議曰聖王之制施德行禮先京師而後諸夏先諸夏而後夷狄詩云率禮不越

遂視既發相土烈烈海外有截

師古曰商頌長發之詩也率備也遂徧也既盡

也發行也相土契之孫也烈烈威也截齊也言殷宗受命為諸侯能修禮度無有所踰越也徧省視之教令盡

行而相土之威烈烈然威四海之外皆整齊也宋祁曰詳末常有也字陛下聖德充塞天

地

師古曰充實也塞滿也

光被四表

師古曰四表四海之外

匈奴單于鄉風

慕化奉珍朝賀

師古曰鄉禮口嚮

自古未之有也其禮儀宜如

諸侯王位次在下

宋祁曰如就作加

望之以為單于非正朔所

加故稱敵國宜待以不臣之禮位在諸侯王上外夷稽

首稱藩中國讓而不臣此則羈縻之誼謙亨之福也

師古

曰易謙卦之辭曰謙亨天道下濟而光明地道卑而上行言謙之為德無所不通也亨音火庚反書曰

戎狄荒服

師古曰
逸書也

言其來服荒忽亡常如使匈奴後嗣

卒有烏窠鼠伏闕於朝享不為畔臣

師古曰卒終也木
以客禮待之若後

不來非
叛臣

信讓行乎蠻貉福祚流于亡窮萬世之長策也

天子采之下詔曰蓋聞五帝三王教化所不施不及以
政今匈奴單于稱北藩朝正朔朕之不逮德不能弘覆
其以客禮待之令單于位在諸侯王上贊謁稱臣而不
名及宣帝寢疾選大臣可屬者

師古曰屬
音之欲反

引外屬侍中

樂陵侯史高太子太傅望之少傅周堪至禁中拜高為
大司馬車騎將軍望之為前將軍光祿勳堪為光祿大
夫皆受遺詔輔政領尚書事宣帝崩太子襲尊號是為
孝元帝望之堪本以師傅見尊重上即位數宴見言治
亂陳王事望之選白宗室明經達學散騎諫大夫劉更
生給事中與侍中金敞並拾遺左右四人同心謀議勸
道上以古制師古曰道多所欲匡正上甚鄉納之師古曰鄉
讀曰鸞意信鸞初宣帝不甚從儒術任用法律而中書
之而納用其言

宦官用事中書令宏恭石顯久典樞機明習文法亦與

車騎將軍高為表裏論議常獨持故事不從望之等恭

顯又時傾仄見詘

文穎曰恭顯心不自安也師古曰文說非也言其不能持正故議論大事

見詘於天子也反古側字望之以為中書政本宜以賢明之選自武

帝游宴後庭故用宦者非國舊制又違古不近刑人之

義

師古曰禮曰刑人不在君側也

白欲更置士人絲是大與高恭顯忤

師古曰絲讀與由同忤謂相違逆也

上初即位謙讓重改作

師古曰重難也未欲更置

士人於中書也議久不定出劉更生為宗正望之堪數薦名儒

茂材以備諫官會稽鄭朋陰欲附望之上疏言車騎將

軍高遣客為姦利郡國及言許史子弟罪過章視周堪

師古曰視讀曰示以朋所奏之章示堪也堪白令朋待詔金馬門朋奏記望

之曰將軍體周召之德秉公綽之質有卞莊之威師古曰周

謂周公旦召謂召公奭公綽孟公綽也廉正寡欲卞莊子魯卞邑大夫蓋勇士也召讀曰邵至乎耳

順之年師古曰論語孔子曰六十而耳順履折衝之位號至將軍誠士

之高致也窟穴黎庶莫不懼喜咸曰將軍其人也師古曰國

家委任誠得其人也今將軍規撫云若管晏而休遂行日仄至周

召乃留乎

師古曰問望之立意當趣如管晏而止為敬
恢廓其道日昃不食追周召之蹟然後已乎

撫讀曰模
其字從木

若管晏而休則下走將歸延陵之臯

應劭曰
下走僕

也張晏曰吳公子札食邑延陵薄吳王之行弃國而耕
於臯澤朋云望之所為若但如管晏則不處漢朝將歸
會稽尋延陵之軌隱耕臯澤之中也
師古曰下走者自謙言趨走之役也修農圃之疇師古曰美

疇曰畜雞種黍竢見二子没齒而已矣

師古曰論語云
子路從而後遇

丈人以杖荷篠止于路宿殺雞為黍而食之見其二子
馬明日子路行以告子曰隱者也使子路反見之至則
行矣朋之所云蓋謂此也竢古俟字也俟
待也没齒終身也篠草器也音徒鈞反如將軍昭然

度行積思塞邪枉之險蹊宣中庸之常政

師古曰度行
度越常檢而

為高行也蹊徑
謂道也音奚

興周召之遺業親日仄之兼聽則下走

其庶幾願竭區區底厲鋒鏑

師古曰鋒刃端也鏑刃旁也音五各反

奉萬

分之一望之見納朋接待以意

師古曰與之相見納用其說也

朋數稱

述望之短車騎將軍

師古曰短謂毀其短惡也

言許史過失後朋行

傾邪望之絕不與通朋與大司農史李宮俱待詔堪獨

白宮為黃門郎朋楚士怨恨

張晏曰朋會稽人會稽并屬楚蘇林曰楚人脆急也

更求入許史推所言許史事曰皆周堪劉更生教我我

關東人何以知此於是侍中許章白見朋朋出揚言曰

我見言前將軍小過五大罪一中書令在旁知我言狀

望之聞之以問宏恭石顯顯恭恐望之自訟下於它吏

即挾朋及待詔華龍

師古曰華音胡化反

龍者宣帝時與張子嬌

等待詔

師古曰嬌音巨遙反字或作僑

以行汙濊不進

師古曰濊與穢同

欲入

堪等堪等不納故與朋相結恭顯令二人告望之等謀

欲罷車騎將軍疏退許史狀候望之出休日令朋龍上

之事下弘恭問狀望之對曰外戚在位多奢滯欲以匡

正國家非為邪也恭顯奏望之堪更生朋黨相稱舉數

譖訴大臣毀離親戚欲以專擅權執為臣不忠誣上不
道請謁者召致廷尉時上初即位不省謁者召致廷尉
為下獄也可其奏後上召堪更生曰繫獄上大驚曰非

但廷尉問邪以責恭顯皆叩頭謝上曰令出視事

○宋祁曰

令出視事疑作今出視事一本作出乃使視事

恭顯因使高

○宋祁曰恭顯因使高疑作恭顯乃

因史高

言上新即位未以德化聞於天下而先驗師傅既

下九卿大夫獄宜因決免於是制詔丞相御史前將軍

望之傳朕八年亡它罪過今事久遠識忘難明

師古曰言不能

盡記有遺忘者故難明

其赦望之罪收前將軍光祿勳印綬及堪

更生皆免為庶人而朋為黃門郎後數月制詔御史國

之將興尊師而重傅故前將軍望之傅朕八年道以經

術厥功茂焉

師古曰道讀曰導茂美也

其賜望之爵關內侯食邑六

百戶給事中朝朔望坐次將軍天子方倚欲以為丞相

師古曰倚音於綺反

會望之子散騎中郎伋上書訟望之前事

師古

曰伋音級

事下有司復奏望之前所坐明白無譖訴者

師古曰言

望之自有罪非人譖諧而訴之也

而教子上書稱引亡辜之詩失大臣

體不敬請逮捕弘恭石顯等知望之素高節不詘辱建

白望之

師古曰建立此議而白之於天子

前為將軍輔政欲排退許史

專權擅朝幸得不坐復賜爵邑與聞政事

師古曰與讀曰豫

不

悔過服罪深懷怨望教子上書歸非於上

師古曰言歸懇於天子也

自以託師傅懷終不坐

師古曰言恃舊恩自謂終無罪坐懷此心

非頗詘望

之於牢獄塞其怏怏心則聖朝亡以施恩厚

服虔曰非不也

上

曰蕭太傅素剛安肯就吏顯等曰人命至重望之所坐

語言薄罪必亡所憂上乃可其奏顯等封以付謁者敕

令召望之手付因令太常急發執金吾車騎馳圍其第

○宋祁曰越本車作軍字

使者至召望之望之欲自殺其夫人止之

以為非天子意望之以問門下生朱雲雲者好節士勸

望之自裁於是望之叩天歎曰

師古曰叩讀曰仰

吾嘗備位將

相年踰六十矣老入牢獄苟求生活不亦鄙乎字謂雲

曰游

師古曰朱雲字游呼其字

趣和藥來無久留我死

師古曰趣讀曰促

竟

飲鴆自殺天子聞之驚拊手曰曩固疑其不就牢獄果

然殺吾賢傅是時太官方上晝食上乃卻食為之涕泣

哀慟左右

師古曰慟動也

於是召顯等責問以議不詳

師古曰詳審也

皆免冠謝良久然後已望之有罪死有司請絕其爵邑有詔加恩長子伋嗣為關內侯天子追念望之不忘每歲時遣使者祠祭望之冢終元帝世望之八子至大官者育咸由

育字次君少以父任為太子庶子元帝即位為郎病免後為御史大將軍王鳳以育名父子著材能除為功曹遷謁者使匈奴副校尉

師古曰時令校尉為使於匈奴而育為之副使故校尉副校尉也

後為茂陵令會課育第六

師古曰如今之考第高下

而漆令郭舜殿

見責問

師古曰殿後也言有所負最居下也殿音登見反

育為之請扶風怒曰

君課第六裁自脫

師古曰脫免也音吐活反

何暇欲為左右言

師古曰左

右者言與同列在其左右若今言旁人也

及罷出傳召茂陵令詣後曹

如淳曰賊

曹決曹皆後曹

當以職事對

師古曰忿其為漆令言故欲以職事責之○宋祁曰注文忿字越本

作怒育徑出曹書佐隨牽育有案佩刀曰蕭育杜陵男子

何詣曹也

師古曰自言欲免官而去但是杜陵一白衣男子耳何須召我詣曹乎

遂趨出

欲去官明旦詔召入拜為司隸校尉育過扶風府門官

屬掾史數百人拜謁車下後坐失大將軍指免官復為
中郎將使匈奴歷冀州青州兩部刺史長水校尉泰山
太守入守大鴻臚以鄆名賊梁子政阻山為害久不伏

辜

師古曰名賊者自顯其名無所避匿言其事也○宋祁曰注文事字當作彊字

育為右扶風

數月盡誅子政等坐與定陵侯淳于長厚善免官哀帝
時南郡江中多盜賊拜育為南郡太守上以育耆舊名

臣乃以三公使車載育入殿中受策

孟康曰使車三公奉使之車若安車

也○宋祁曰三公下疑有官字

曰南郡盜賊羣輩為害朕甚憂之以太

守威信素著故委南郡太守之官其於為民除害安元
元而已亡拘於小文加賜黃金二十斤育至南郡盜賊
靜病去官起家復為光祿大夫執金吾以壽終於官育
為人嚴猛尚威居官數免稀遷少與陳咸朱博為友著

聞當世往者有王陽貢公

○宋祁曰公
字當作禹字

故長安語曰蕭

朱結綬王貢彈冠言其相薦達也始育與陳咸俱以公

卿子顯名咸最先進年十八為左曹二十餘御史中丞

○宋祁曰餘字
下當添為字

時朱博尚為杜陵亭長為咸育所攀援

入王氏

師古曰援引也音爰

後遂並歷刺史郡守相及為九卿而

博先至將軍上卿歷位多於咸育遂至丞相育與博後有隙不能終故世以交為難

咸字仲為丞相史舉茂材好時令遷淮陽泗水內史張掖弘農河東太守所居有迹數增秩賜金後免官復為越騎校尉護軍都尉中郎將使匈奴至大司農終官

由字子驕為丞相西曹衛將軍掾遷謁者使匈奴副校尉後舉賢良為定陶令遷太原都尉安定太守治郡有

聲多稱薦者初哀帝為定陶王時由為定陶令夫王指
頃之制書免由為庶人哀帝崩為復土校尉京輔左輔
都尉遷江夏太守平江賊成重等有功增秩為陳留太
守元始中作明堂辟雍大朝諸侯徵由為大鴻臚會病
不及賓贊師古曰贊導九賓之事○宋祁曰會病不及
當云會病行進不及賓贊注文贊導九賓之
事當云贊導九賓之禮也還歸故官病免復為中散大夫終官家至
吏二千石者六七十人

贊曰蕭望之歷位將相籍師傅之恩可謂親昵亡間

師古

曰間隙也

及至謀泄隙開讒邪構之卒為便嬖宦豎所圖

古師

曰圖謀也

哀哉不然望之堂堂折而不撓

師古曰撓曲也音女教反

身為

儒宗有輔佐之能近古社稷臣也

前漢書卷七十八

前漢書卷七十八考證

蕭望之傳高者請丞相御史注○劉奉世曰誤斷其文

○胡三省曰高者則請丞相御史試事次者則中二千石試事文意固是一貫而分高次則非顏誤斷也

使侍中成都侯金安上諭意○胡三省曰功臣表及霍光傳皆作都成侯此傳作成都侯誤

蕭望之子育大將軍王鳳以育名父子○臣召南按名

父子與王吉傳賢父子同猶云名父之子也

蕭育杜陵男子注云云○凌穉隆曰是不甘辱之意師

古注恐未必然

臣石南

按男子猶言大丈夫言我不

以官爵介意

以鄆名賊梁子政注師古云云○顧炎武曰名賊猶言
名王謂賊之有名號者師古注非

前漢書卷七十八考證

欽定四庫全書

前漢書卷七十九

漢 蘭 臺 令 史班 固撰

唐正議大夫行祕書少監琅邪縣開國子顏師古注

馮奉世傳第四十九

馮奉世字子明上黨潞人也師古曰潞音路徙杜陵其先馮亭

為韓上黨守秦攻上黨絕太行道師古曰太行山名險道所經行也行音胡

郎反○宋祁曰注文經行疑當刪行字韓不能守馮亭乃入上黨城守於

趙

師古曰據守上黨城而以降趙

趙封馮亭為華陽君與趙將括距秦

師古曰括趙括趙奢之子也

戰死於長平宗族繇是分散

師古曰繇讀與由同

或留潞或在趙在趙者為官帥將

師古曰帥音所類反字或作帥其義兩通

官帥將子為代相及秦滅六國而馮亭之後馮毋擇馮

去疾馮劫皆為秦將相焉漢興文帝時馮唐顯名即代

相子也至武帝末奉世以良家子選為郎昭帝時以功

次補武安長失官年三十餘矣乃學春秋涉大義讀兵

法

○宋祁曰浙本兵法下有明習二字

前將軍韓增奏以為軍司空令本

始中從軍擊匈奴軍罷復為郎先是時漢數出使西域

多辱命不稱或貪汙為外國所苦

師古曰苦謂困辱之

是時烏孫

大有擊匈奴之功而西域諸國新輯

師古曰輯與集同集和也

漢方

善遇欲以安之選可使外國者前將軍增舉奉世以衛

候使持節送大宛諸國客至伊修城

師古曰伊修城在鄯善國漢於其中

置屯田吏上也

都尉宋將言莎車與旁國共攻殺漢所置莎車

王萬年

師古曰莎車國名萬年其王名也莎音素和反○宋祁曰宋字疑是宗字

并殺漢使

者奚克國時匈奴又發兵攻車師城不能下而去莎車

遣使揚言北道諸國已屬匈奴矣於是攻劫南道與鞏

盟畔漢從鄴善以西皆絕不通

師古曰鄴音善

都護鄭吉校尉

司馬意皆在北道諸國間奉世與其副嚴昌計以為不

亟擊之

師古曰亟急也音居力反

則莎車日彊其執難制必危西域

遂以節諭告諸國王因發其兵南北道合萬五千人進

擊莎車攻拔其城莎車王自殺傳其首詣長安諸國悉

平威振西域奉世乃罷兵以聞宣帝召見韓增曰賀將

軍所舉得其人奉世遂西至大宛大宛聞其斬莎車王

敬之異於他使得其名馬象龍而還

師古曰言馬形似龍者○劉攽曰此

馬名曰象龍也

上甚說

師古曰說請曰悅

下議封奉世

師古曰下其事令議之

丞

相將軍皆曰春秋之義大夫出疆有可以安國家則顯

之可也

師古曰顯與專同

奉世功效尤著宜加爵土之賞少府

蕭望之獨以奉世奉使有指

師古曰本為送諸國客

而擅矯制違

命發諸國兵雖有功效不可以為後法即封奉世開後

奉使者利以奉世為比

師古曰比必寐反○宋祁曰注文比字下疑有音字

爭逐

發兵要功萬里之外

師古曰逐競也

為國家生事於夷狄漸不

可長奉世不宜受封上善望之議以奉世為光祿大夫

水衡都尉

○宋祁曰善望之議字下疑有竟不封三字

元帝即位為執金吾

上郡屬國歸義降胡萬餘人反去初昭帝末西河屬國

胡伊酋若王亦將眾數千人畔

師古曰酋音才由反

奉世輒持節

將兵追擊

師古曰言西河上郡羌胡反畔子明再追擊之

右將軍典屬國常惠

薨奉世代為右將軍典屬國加諸吏之號數歲為光祿

勳永光二年秋隴西羌多姐旁種反

師古曰多所廉反又音先廉反姐音

紫今西羌尚有此姓而多音先冉反○宋祁曰注文多字下當有音字

詔召丞相韋玄成

御史大夫鄭弘大司馬車騎將軍王接左將軍許嘉右

將軍奉世入議是時歲比不登

師古曰比類也登成也

京師穀石

二百餘

師古曰一石直二百餘錢也下皆類此

邊郡四百關東五百四方

飢饉朝廷

○宋祁曰庭當作廷

方以為憂而遭羌變元成等漠然

莫有對者

師古曰漢無聲也音莫

奉世曰羌虜近在竟內背畔

師古

曰竟謂曰境

不以時誅亡以威制遠蠻臣願帥師討之上問

用兵之數對曰臣聞善用兵者役不再興糧不三載故

師不久暴而天誅亟決

師古曰暴露也亟急也音居力反○宋祁曰注文暴字下疑有

謂暴

往者數不料敵

師古曰料量也音聊

而師至於折傷再三發

輶

如淳曰輶推也淮南子曰內郡輶車而餉音而隴反○宋祁曰注文而隴字疑是如腫字

則曠日

煩費威武虧矣今反虜無慮三萬人法當倍用六萬人

師古曰無慮舉凡之言也無小思慮而大計也

然羌戎弓矛之兵耳器不犀利

如淳曰今俗刀兵利為犀晉灼曰犀堅也師古曰晉說是

可用四萬人一月足以決

丞相御史兩將軍皆以為民方收斂時未可多發萬人

屯守之且足奉世曰不可天下被飢饉士馬羸耗

師古曰耗

減也音呼到反

守戰之備久廢不簡

師古曰簡謂選揀○宋祁曰注文揀字疑是練字

夷狄皆有輕邊吏之心而羌首難

師古曰言創首為寇難也

今以萬

人分屯數處虜見兵少必不畏懼戰則挫兵病師守則

百姓不救如此怯弱之形見羌人乘利諸種並和

師古曰和

應也音胡卧反相扇而起臣恐中國之役不得止於四萬非財

幣所能解也故少發師而曠日

師古曰曠空也空費其日而無功也

與一

舉而疾決利害相萬也

師古曰相比則為萬倍也

固爭之不能得有

詔益二千人於是遣奉世將萬二千人騎以將屯為名

師古曰且云領兵屯田不言討賊○宋祁曰萬二千人浙江本無人字注文屯田字上疑有為字

典屬

國任立護軍都尉韓昌為偏裨到隴西分屯三處典屬國為右軍屯白石護軍都尉為前軍屯臨洮奉世為中

軍屯首陽西極上

如淳曰西極山名

前軍到降同阪

師古曰阪平阪也降

同者阪名也阪府板反降音下江反陂音普何反○宋祁曰注文府字上常有音字

先遣校尉在

前與羌爭地利又別遣校尉救民於廣陽谷羌虜盛多皆為所破殺兩校尉奉世具上地形部衆多少之計願益三萬六千人乃足以決事書奏天子大為發兵六萬餘人拜太常弋陽侯任千秋為奮武將軍以助焉奉世

上言願得其衆不須煩大將

○宋祁曰須字下常有復字

因陳轉輸

之費上於是以璽書勞奉世且讓之

師古曰讓責也責其不須大將

曰

皇帝問將兵右將軍

師古曰官為右將軍而將兵在外故謂之將兵右將軍也

甚苦

暴露羌虜侵邊境殺吏民甚逆天道故遣將軍帥士大

夫行天誅以將軍材質之美奮精兵誅不軌百下百全

之道也

○宋祁曰徐錯去百下二字予謂不當去

今乃有畔敵之名

如淳曰不敢當

敵攻戰為畔敵也

大為中國羞以昔不閑習之故邪

師古曰言未嘗當羌

虜不測其形便

以恩厚未洽信約不明也

師古曰言將軍恩惠未洽於士卒又不能

明其約誓使在下信之

朕甚怪之上書言羌虜依深山多徑道不

得不多分部遮要害須得後發營士足以決事部署已定執不可復置大將聞之前為將軍兵少不足自守故

發近所騎日夜詣

師古曰近所隨近之處也日夜言兼行不休息也詣詣軍所也

非為

擊也

師古曰助其守

今發三輔河東弘農越騎迹射欽飛設者

羽林孤兒及呼速系噉種

劉德曰噉音辱羌別種也設者謂能張弩者也設音工豆

反衆音力追反噉音乃殺反○劉奉世曰呼速衆則呼遯累單于所將五萬衆來降者也噉者匈奴傳所謂西

等君長數千人降漢者此二種有兵衆皆宣帝時來降今使征羌

方急遣

師古曰言今速至軍所也

且兵凶器也必有成敗者患

○宋祁曰南木作成敗者之患

策不豫定

料敵不審也故復遣奮武將軍兵法曰大將軍出必有偏裨所以揚威武參計策將軍又何疑焉夫愛吏士得衆心舉而無悔禽敵必全將軍之職也若乃轉輸之費

則有司存將軍勿憂須奮武將軍兵到合擊羌虜

師古曰須

也待十月兵畢至隴西十一月並進羌虜大破斬首數千

級餘皆走出塞兵未決間漢復發募士萬人拜定襄太

守韓安國為建威將軍

師古曰自別有此安國非武帝時人也

未進聞羌

破還上曰羌虜破散創艾亡逃出塞

師古曰創艾謂懣懼也創音初向反

艾讀曰又

其罷吏士頗留屯田備要害處明年二月奉世還

京師更為左將軍光祿勳如故其後錄功拜爵下詔曰

羌虜桀黠賊害吏民攻隴西府寺燔燒置亭

師古曰置謂置驛之

也

所絕道橋甚逆天道左將軍光祿勳奉世前將兵征討

斬捕首虜八千餘級鹵馬牛羊以萬數賜奉世爵關內

侯食邑五百戶黃金六十斤裨將校尉三十餘人皆拜

後歲餘奉世病卒居爪牙官前後十年為折衝宿將功

名次趙克國奮武將軍任千秋者其父宮昭帝時以丞

相徵事捕斬反者左將軍上官桀封侯宣帝時為太常

薨千秋嗣後

○宋祁曰
後疑作侯

復為太常成帝時樂昌侯王商

代奉世為左將軍而千秋為右將軍後亦為左將軍子

孫傳國至王莽乃絕云奉世死後二年西域都護甘延

壽以誅郅支單于封為列侯時丞相匡衡亦用延壽矯

制生事據蕭望之前議以為不當封而議者咸美其功

上從衆而侯之於是杜欽上疏追訟奉世前功曰前莎

車王殺漢使者約諸國背畔

師古曰約謂共為契約

左將軍奉世

以衛候便宜發兵誅莎車王策定城郭功施邊境

師古曰城

郭者謂西域諸國為城郭而居者

議者以奉世奉使有指春秋之義亡

遂事漢家之法有矯制

師古曰無遂事者謂臨時制宜前事不可必遂也漢家之法擅

矯詔命雖有功勞不加賞也宋祁曰師古誤注遂事可駁

故不得侯今匈奴支

單于殺漢使者亡保康居都護延壽發城郭兵屯田吏

士四萬餘人以誅斬之封為列侯臣愚以為比罪則郵

支薄量敵則莎車衆用師則奉世寡計勝則奉世為功

於邊境安慮敗則延壽為禍於國家深其違命而擅生

事同延壽割地封而奉世獨不錄臣聞功同賞異則勞

臣疑罪鈞刑殊則百姓惑疑生無常惑生不知所從亡

常則節趨不立師古曰趨讀曰趣趣謂意所嚮不知所從則百姓無所

錯手足師古曰錯置也音干故反奉世圖難忘死信命殊俗師古曰圖難謀

除岡難也信讀曰仲也音干故反成功白著為世使表師古曰白著謂顯明也表猶首也獨抑

厭而不揚師古曰厭音一涉反非聖主所以塞疑厲節之意也願

下有司議上以先帝時事不復錄奉世有子男九人女

四人長女媛以選充後宮為元帝昭儀產中山孝王元

帝崩媛為中山太后隨王就國奉世長子譚太常舉孝

廉為郎功次補天水司馬

如淳曰漢法邊郡置都尉及千人司馬皆不治民也

奉

世擊西羌譚為校尉隨父從軍有功未拜病死譚弟野

王逵立參至大官

師古曰逵音干旬反

野王字君卿受業博士通詩少以父任為太子中庶子

年十八上書願試守長安令宣帝奇其志問丞相魏相

相以為不可許後以功次補當陽長遷為樸陽令徙夏

陽令元帝時遷隴西太守以治行高入為左馮翊歲餘

而池陽令並素行貪汙輕野王外戚年少治行不改野

王部督郵掾殺羽趙都

師古曰都殺羽人而為掾也殺音丁活反又音丁外反羽音許

羽反案驗得其主守盜十金罪收捕並不首吏

師古曰不首吏謂不

伏從收捕也

都格殺並家上書陳寃事下廷尉

○宋祁曰並字下當更有

並字都詣吏自殺以明野王京師稱其威信遷為大鴻臚

數年御史大夫李延壽病卒在位多舉野王上使尚書

選第中二十石

師古曰定其高下之差也

而野王行能第一上曰吾

用野王為三公後世必謂我私後宮親屬以野王為比

師古曰比例也音必寐反

乃下詔曰剛彊堅固確然亡欲大鴻臚野

王是也心辨善辭可使四方少府五鹿充宗是也廉絜

節儉太子少傅張譚是也其以少傅為御史大夫上繇

下第而用譚

師古曰繇讀與由同

越次避嫌不用野王以昭儀兄

故也野王乃歎曰人皆以女寵貴我兄弟獨以賤野王

雖不為三公甚見器重有名當世成帝立有司奏野王

王舅不宜備九卿以秩出為上郡太守

如淳曰以鴻臚秩為太守加

賜黃金百斤朔方刺史蕭育奏封事薦言野王行能高

妙內足與圖身外足以慮化

師古曰圖謀慮思也○宋祁曰注文謀字下當添也

字

竊惜野王懷國之寶而不得陪朝廷與朝者並野王

前以王舅出以賢復入明國家樂進賢也上自為太子

時聞知野王會其病免復以故二千石使行河隄因拜

為琅邪太守是時成帝長舅陽平侯王鳳為大司馬大

將軍輔政八九年矣時數有災異京兆尹王章譏鳳顯

權不可任用薦野王代鳳上初納其言而後誅章語在

元后傳於是野王懼不自安遂病滿三月賜告與妻子

歸杜陵就醫藥大將軍鳳風御史中丞劾奏野王

師古曰風

讀曰諷賜告養病而私自便

師古曰便安也音頻而反

持虎符出界歸

家奉詔不敬杜欽時在大將軍莫府欽素高野王父子

行能奏記於鳳為野王言曰竊見令曰吏二千石告過

長安謁

如淳曰謁者自白得告也律吏二千石以上告歸歸寧道不過行在所者便道之官無辭不

分別予賜

如淳曰予予告也賜賜告也

今有司以為予告得歸賜告

不得是一律兩科失省刑之意

師古曰省減也音所領反

夫三最予

告令也

師古曰在官連有三最則得予告也

病滿三月賜告詔恩也令告

則得詔恩則不得

○宋祁曰景德本令告詔則得恩不得浙本南本云令告則得詔恩不得

失輕重之差又二千石病賜告得歸有故事不得去郡

亡著令

如淳曰律施行無不得去郡之文也

傳曰賞疑從予所以廣恩勸

功也

師古曰疑當賞不當賞則與之疑厚薄則從厚

罰疑從去所以慎刑闕難

知也

師古曰疑當罰不當罰則赦之疑輕重則從輕

今釋令與故事而假不敬

之法

師古曰釋廢棄也假謂假託法律而致其罪

甚違闕疑從去之意即以

二千石守千里之地任兵馬之重不宜去郡將以制刑

為後法者則野王之罪在未制令前也刑賞大信不可不慎鳳不聽竟免野王郡國二千石病賜告不得歸家自此始初野王嗣父爵為關內侯免歸數年年老終于

家子座嗣爵

師古曰座音才戈反

至孫坐中山太后事絕

浚字子產通易太常察孝廉為郎補謁者建昭中選為復土校尉光祿勳于永舉茂材為美陽令功次遷長樂屯衛司馬清河都尉隴西太守治行廉平年四十餘卒

為都尉時言河隄方畧在溝洫志

○宋祁曰在字上當有語字

立字聖卿通春秋以父任為郎稍遷諸曹竟寧中以王

舅出為五原屬國都尉數年遷五原太守徙西河上郡

立居職公廉治行畧與野王相似而多知有恩貸

師古曰貸

音吐戴反

好為條教吏民嘉美野王立相代為太守歌之曰

大馮君小馮君兄弟繼踵相因循聰明賢知惠吏民政

如魯衛德化鈞周公康叔猶二君

師古曰論語稱孔子曰魯衛之政兄弟也

言周公康叔親則兄弟治國之政又相似

後遷為東海太守下溼病痺

師古曰東

海土地下溼故立病痺也痺音必寐反○宋祁曰注文痺字上疑有風字

天子聞之徙立為

太原太守更歷五郡

師古曰更音工行反

所居有迹年老卒官

參字叔平學通尚書少為黃門郎給事中宿衛十餘年

參為人矜嚴好修容儀進退恂恂甚可觀也

師古曰恂恂謹信之

貌音荀

參昭儀少弟行又救備以嚴見憚終不得親近侍

帷幄竟寧中以王舅出補渭陵食官令

如淳曰給陵上祭祀之事

以

數病徙為寢中郎

師古曰亦渭陵之寢郎也

有詔勿事

張晏曰不與勞役執事優

之師古曰雖居其官不親職也○宋祁曰注文優之當作擾之也

陽朔中中山王來朝

參擢為上河農都尉

師古曰上河在兩河富平於此為農都尉

病免官復為

涓陵寢中郎永始中超遷代郡太守以邊郡道遠徙為

安定太守數歲病免復為諫大夫使領護左馮翊都水

綏和中立定陶王為皇太子以中山王見廢師古曰見廢謂不得

為漢嗣也○宋祁曰以字上疑有上字故封王舅參為宜鄉侯以慰王意

參之國上書願至中山見王太后行未到而王薨王病

時上奏願貶參爵以關內侯食邑留長安上憐之下詔

曰中山孝王短命早薨願以舅宜鄉侯參為關內侯歸

家朕甚愍之其還參京師以列侯奉朝請五侯皆敬憚

之

師古曰王氏五侯也

丞相翟方進亦甚重焉數謂參物禁太甚

師古曰言萬物之禁在於太甚人道亦當隨時不宜獨異

君侯以王舅見廢不得在

公卿位今五侯至尊貴也與之並列宜少詘節卑體視

有所宗

師古曰視讀曰示宗尊也

而君侯盛修容貌以威嚴加之此

非所以下五侯而自益者也

師古曰下音胡亞反

參性好禮儀終

不改其恒操項之哀帝即位帝祖母傅太后用事追怨

參姊中山太后陷以祝詛大逆之罪語在外戚傅參以

同產當相坐謁者承制召參詣廷尉參自殺且死仰天

嘆曰參父子兄弟皆備大位身至封侯今被惡名而死
姊弟不敢自惜傷無以見先人於地下死者十七人衆

莫不憐之宗族徙歸故郡

贊曰詩稱抑抑威儀惟德之隅

師古曰大雅抑之詩也抑抑密也隅廉也言有

密靜之德審於威儀則其持心有廉隅

宜鄉侯參鞠躬履方擇地而行

師古

曰鞠躬謹敬貌履方踐方直之道也鞠音居六反○宋祁曰注中鞠躬當云鞠躬曲躬也

可謂淑人

君子然卒死於非罪不能自免

師古曰卒終也

哀哉讒邪交亂

貞良被害自古而然故伯竒放流

師古曰說先云玉國子前母子伯竒後母

子伯封兄弟相重後母欲令其子立為太子乃請伯奇而王信之乃放伯奇也○宋祁曰注文重字當作愛字

孟子宮刑

張晏曰寺人孟子賢者被讒見宮刑作巷伯之詩也

申生雉經

師古曰國語云

晉獻

公黜太子申生乃雉經于新城

屈原赴湘

師古曰楚辭漁

父之篇云屈原曰寧赴湘流葬於江魚腹中也

小弁之詩作離騷之辭興

師古曰小

弁小雅篇名也太子之傳作馮刺幽王信讒黜申后而

旌太子直登也離騷經屈原所作也離遭也騷憂也遭

憂而作辭

經曰心之憂矣涕既隕之

師古曰即小弁

馮

弁音盤

參姊弟亦云悲矣

前漢書卷七十九

前漢書卷七十九考證

馮奉世傳至伊修城注師古曰伊修城在鄯善國云云

○ 臣召南

按伊修城當作伊循城各本俱誤西域傳

鄯善國中有伊循城其地肥美漢置都尉所謂伊循
田官也通鑑亦作伊循知宋時漢書本尚不悞後來
刊本訛循作修耳顏注亦然

初昭帝末西河屬國胡伊苜若王亦將衆數千人畔○

臣召南

按昭帝應是宣帝之訛昭帝時奉世名尚未

著安得持節將兵且西河屬國始置於五鳳四年宣紀可證也當昭帝時尚無西河屬國安得有叛人耶於是遣奉世將萬二千人騎○文義似衍人字

典屬國為右軍屯白石○地理志狄道白石山在東狄道隴西郡治也

馮奉世子野王御史大夫李延壽病卒○即公卿表所云繁延壽也此文作李此人有二姓

馮奉世子參參擢為上河農都尉注師古曰上河在西

河富平於此為農都尉○

臣召南

按地理志西河郡

有富昌縣無富平縣且富昌縣下亦不云農都尉治
又顏注叙傳曰上河地名農都尉者典農事二注自
相矛盾按地理志富平有二一屬平原郡故名厭次
宣帝時更名也一屬北地郡有北部都尉涇懷都尉
亦不云農都尉治也惟張掖郡番和縣有農都尉治
明文

前漢書卷七十九考證

欽定四庫全書

史部

前漢書卷

八十二

詳校官侍讀_臣陳萬青

洗馬_臣王坦修覆勘

覆校官中書_臣陳墉

校對官中書_臣馮培

謄錄監生_臣鄒曾蔭

謄錄監生_臣宋鏡

欽定四庫全書

前漢書卷八十

漢

蘭

臺

令

史班

固撰

唐正議大夫行祕書少監琅邪縣開國子顏師古注

宣元六王傳第五十

孝宣皇帝五男許皇后生孝元帝張婕妤生淮陽憲王

欽衛婕妤生楚孝王躡

師古曰
躡音敖

公孫婕妤生東平思王

宇戎婕妤生中山哀王竟

淮陽憲王欽元康三年立母張婕妤有寵於宣帝霍皇后廢後上欲立張婕妤為后久之懲艾霍氏欲宮皇太

子

師古曰艾讀曰又又創也

迺更選後宮無子而謹慎者迺立長陵

王婕妤為后令母養太子后無寵希御見唯張婕妤最幸而憲王壯大好經書法律聰達有材帝甚愛之太子

寬仁喜儒術

師古曰喜好也音許吏反

上數嗟歎憲王曰真我子也

常有意欲立張婕妤與憲王然用太子起於微細上少

依倚許氏

師古曰倚音於起反

及即位而許后以殺死太子蚤失

母故弗忍也

師古曰蚤古早字也。宋祁曰也字疑可刪。

○久之上以故丞相

韋賢子元成陽狂讓侯兄

○宋祁曰兄字上疑有於字

經明行高稱

於朝廷乃召拜元成為淮陽中尉欲感諭憲王輔以推

讓之臣

○宋祁曰推字疑作禮字

由是太子遂安宣帝崩元帝即位

乃遣憲王之國時張健仔已卒憲王有外祖母舅張博

兄弟三人歲至淮陽見親

師古曰憲王外祖母隨王在淮陽博等每來謁見其母

輒受王賜後王上書請徙外家張氏於國博上書願留

守墳墓獨不徙王恨之後博至淮陽王賜之少博言負

責數百萬

師古曰責謂假貸人財物未償者也責音側懈反

願王為償王不許

博辭去令弟光恐云王遇大人益解

師古曰恐謂怖動也大人博自稱其

母也解讀曰懈○宋祁曰恐字下疑有王字注文怖字下疑有之字

博欲上書為大人乞

骸骨去王乃遣人持黃金五十斤送博博喜還書謝

師古

曰還書報書○宋祁曰注未當有也字

為諂語咸稱譽王因言當今朝廷

無賢臣灾變數見足為寒心萬姓咸歸望於大王大王

奈何恬然

師古曰恬然安靜貌也恬音大兼反

不求入朝見輔助主上乎

使弟光數說王宜聽博計今於京師說用事貴人為王

求朝王不納其言後光欲至長安辭王復言願盡力與

博共為王求朝王即日至長安可因平陽侯

○宋祁曰陽字疑作

陵字光得王欲求朝語馳使人語博博知王意動復遺王

書曰博幸得肺腑

師古曰自云於王有親也

數進愚策未見省察北

游燕趙欲循行郡國求幽隱之士聞齊有駟先生者善

為司馬兵法大將之材也博得謁見承閒進問五帝三

王究竟要道卓爾非世俗之所知

師古曰卓爾高遠貌也自言見駟先生問

以要道知其高遠也

今邊境不安天下騷動微此人其莫能安也

師古曰微無也○宋祁曰浙木無人其字又一本無此人字又聞北海之瀕有賢人

馬

師古曰瀕涯也音類又音賓

累世不可逮然難致也

師古曰逮及也言其材智

不可及也致至也難得召而至也

得此二人而薦之功亦不細矣博願

馳西以此赴助漢急無財幣以通顯之趙王使謁者持

牛酒黃金三十斤勞博

師古曰勞謂問遺之音來到反

博不受復使人

願尚女

師古曰尚女者王欲取博女以自配也

聘金二百斤博未許會得

光書云大王已遣光西與博并力求朝博自以棄捐不

意大王還意反義結以朱顏

師古曰還猶回也

願殺身報德朝

事何足言大王誠賜咳唾使得盡死湯禹所以成大功

也駟先生蓄積道術書無不有

師古曰言凡是書籍皆有之

願知大

王所好請得輒上

○宋祁曰此下當添八字云師古曰上與王也

王得書喜

說

如淳曰上與王也○宋祁曰此注當改作師古曰說讀曰悅

報博書曰子高廼幸

左顧存恤發心惻隱

師古曰左顧猶言枉顧也

顯至誠

○宋祁曰顯字下疑有以

字納以嘉謀語以至事

師古曰以至極之市告語我○宋祁曰注末疑有也字

雖

亦不敏敢不論意

師古曰論曉也

今遣有司為子高償責二百

萬是時博女壻京房以明易陰陽得幸於上數召見言

事自謂為石顯五鹿充宗所排謀不得用數為博道之

博常欲誑耀淮陽王即具記房諸所說災異及召見密

語持予淮陽王以為信驗詐言已見中書令石君求朝

許以金五百斤賢聖制事蓋慮功而不計費

師古曰志在成功不

惜財費也○宋祁曰詐言別本無詐字

昔禹治鴻水百姓罷勞

師古曰罷讀曰疲

成功既立萬世賴之今聞陛下春秋未滿四十髮齒墮

落太子幼弱佞人用事陰陽不調百姓疾疫飢饉死者

且半鴻水之害殆不過此

師古曰謂堯時水災不大於今

大王緒欲救

世

師古曰緒業也
一曰始為端緒

將比功德何可以忽

師古曰言比功
德於古帝王也

忽怠
忘也

博已與大儒知道者為大王為便宜奏

師古曰大
儒知道謂

京房也道
道術也

陳安危指災異大王朝見先口陳其意而後

奏之上必大說

師古曰說
讀曰悅

事成功立大王即有周邵之

名邪臣散亡公卿變節功德亡比而梁趙之寵必歸大

王

如淳曰梁王景帝弟欲為
嗣趙王如意幾代惠帝也

外家亦將富貴何復望大

王之金錢王喜說

師古曰說
讀曰悅

報博書曰廼者詔下止諸

侯朝者寡人慤然不知所出

師古曰慤痛也
不知所出也慤音才咸反

子高素有顏冉之資臧武之智

師古曰顏顏回也冉冉耕也字伯牛皆孔子弟

子論語稱孔子曰德行顏淵閔子騫冉伯牛仲弓臧武者魯大夫臧武仲也名紇論語稱子曰若臧武仲之智

故王引子貢之辯師古曰論語稱孔子卞莊子之勇師古

曰卞莊子兼此四者世之所鮮師古曰鮮少既開端緒

願卒成之師古曰卒終也求朝義事也奈何行金錢乎博報曰

已許石君須以成事師古曰須待也王以金五百斤予博會房

出為郡守離左右顯具得此事告之○宋祁曰顯字上疑有石字告之之

刪房漏泄省中語博兄弟誑誤諸侯王誹謗政治狡

字當

猾不道皆下獄有司奏請逮捕欽上不忍致法遣諫大

夫王駿賜欽璽書曰皇帝問淮陽王有司奏王王舅張

博數遺王書非毀政治謗訕天子褒舉諸侯稱引周湯

以調惑王

師古曰調古詭字○
宋祁曰周當作禹

所言尤惡悖逆無道王

不舉奏而多與金錢報以好言辜至不赦朕惻焉不忍

聞

師古曰惻痛也○宋祁曰
朕惻焉當云朕甚惻焉

為王傷之推原厥本不祥

自博

師古曰祥善也自從也
不善之事從博起也

惟王之心匪同于凶已詔

有司勿治王事遣諫大夫駿申諭朕意

師古曰申謂約
束之○宋祁曰

注文中字下 詩不云乎靖恭爾位正直是與師古曰大雅小明之

詩也與借也言人能安靜而恭以守其位借於正直則明神聽之用錫福善 王其勉之駿諭

指曰

師古曰璽書之外天子又有指意并今駿曉告於王也

禮為諸侯制相朝聘

之義蓋以考禮壹德尊事天子也

師古曰考成也壹德謂不二其心也

且

王不學詩乎詩云俾侯於魯為周室輔

師古曰魯頌閔宮之詩也言立

周公子伯禽使為諸侯于魯國而作周家之藩輔

今王舅博數遺王書所言悖

逆王幸受詔策通經術

如淳曰詔策若廣陵王策口無通宵人母作匪德也經術之義

不得

知諸侯名譽不當出竟

師古曰竟讀口境

天子普覆德布

於朝而恬有博言

師古曰恬安也開博邪言安而受之

多予金錢與相報

應不忠莫大焉故事諸侯王獲罪京師罪惡輕重縱不

伏誅必蒙遷削貶黜之罪

師古曰故事者言舊制如此也

未有但已者

也

師古曰但徒也空也已止也未有空然而止者也

今聖主赦王之罪又憐王

失計忘本為博所惑加賜璽書使諫大夫申諭至意殷

勤之恩豈有量哉博等所犯惡大

○宋祁曰犯字下當有罪字

羣下

之所共攻王法之所不赦也自今以來王毋復以博等

累心

師古曰累音力瑞反

務與衆棄之春秋之義大能變改

師古曰以

有過而能變改者為大

易曰藉用白茅无咎

師古曰此大過初六爻辭也茅者潔白之物取其自然故用藉致享於神慎之至也

○宋祁曰注丈故用藉當作故用為藉

言臣子之道

改過自新絜已以承上然後免於咎也王其留意慎戒

惟思所以悔過易行塞重責稱厚恩者

師古曰塞猶補也稱副也如

此則長有富貴社稷安矣於是淮陽王欽免冠稽首謝

曰秦藩無狀

師古曰無善狀

過惡暴列

師古曰暴謂章顯也

陛下不忍致

法加大恩遣使者申諭道術守藩之義伏念博罪惡尤

深當伏重誅臣欽願悉心自新奉承詔策

師古曰悉盡也頓首

死罪京房及博兄弟三人皆棄市妻子徙邊至成帝即位以淮陽王屬為叔父敬寵之異於它國王上書自陳舅張博時事頗為石顯等所侵因為博家屬徙者求還丞相御史復劾欽前與博相遺私書指意非諸侯王所宜蒙恩勿治事在赦前不悔過而復稱引自以為直失藩臣體不敬上加恩許王還徙者三十六年薨子文王玄嗣二十六年薨子續嗣

孟康曰續音引師右曰音弋善反

王莽時絕

楚孝王躡甘露二年立為定陶王三年徙楚成帝河平

中入朝時被疾天子閔之下詔曰盖開天地之性人為

貴人之行莫大於孝師古曰孝經載孔子之言楚王躡素行孝順仁

慈之國以來二十餘年娥介之過未嘗聞朕甚嘉之今

迺遭命離于惡疾師古曰離亦遭也夫子所痛曰蔑之命矣夫

斯人也而有斯疾也師古曰夫子孔子也論語云伯牛有疾子問之自牖執其手曰蔑之

命矣夫斯人也而有斯疾也蔑無也言命之所遭無有善惡如斯善人而有如斯惡疾深痛之也朕甚

閔焉夫行純茂而不顯異則有國者將何最哉師古曰純大也

一曰善也茂美也最勉厲也書不云乎用德章厥善師古曰尚書盤庚之辭也言褒

賞有德以明其善行

今王朝正月詔與子男一人俱

師古曰從王入朝也

其

以廣戚縣戶四千三百封其子勲為廣戚侯明年踞薨子懷王文嗣一年薨無子絕明年成帝復立文弟平陸

侯衍

○宋祁曰陸一本作陵

是為思王二十一年薨子紆嗣王莽

時絕初成帝時又立紆弟景為定陶王廣戚侯勲薨諡曰煬侯子顯嗣平帝崩無子王莽立顯子嬰為孺子奉平帝後莽篡位以嬰為定安公漢既誅莽更始時嬰在長安平陵方望等頗知天文以為更始必敗嬰本統當

立者也

師古曰言其舊已繼平帝後當正統

共起兵將嬰至臨涇立為天

子更始遣丞相李松擊破殺嬰云

東平思王宇甘露二年立元帝即位就國壯大通姦犯

法

師古曰與姦搯交通好犯法也

上以至親貫弗罪傅相連坐

師古曰頻坐也

獲久之事太后內不相得太后上書言之求守杜陵園

張晏曰宣帝陵也宮人無子乃守園陵

上於是遣太中大夫張子嬌

師古曰嬌

字或作僑並音鉅昭反

奉璽書敕諭之

師古曰約敕而曉告之也

曰皇帝問東

平王蓋開親親之恩莫重於孝尊尊之義莫大於忠故

諸侯在位不驕以致孝道制節謹度以翼天子

師古曰翼佐也

然後富貴不離其身

○宋祁曰舊無不字云離於身蘇子瞻云此文與孝經小異離附離

也今作不離其身疑為俗儒所添也

而社稷可保今聞王自修有關本朝

不和

師古曰謂東平國之朝也

流言紛紛

○宋祁曰下紛字當作然

謗自內興朕

甚憊焉為王懼之

師古曰憊痛也音才感反

詩不云乎毋念爾祖述

修厥德永言配命自求多福

師古曰大雅文王之詩也無念念也言當念爾先祖

之道修其德則長配天命此乃所以自求多福

朕惟王之春秋方剛

師古曰言其少年血

氣盛○宋祁曰注未當有也字

忽於道德

師古曰忽遺忘也

意有所移忠言未

納師古曰謂漸染其惡人而移其性未受忠言也故臨遣太中大夫子驥諭王

朕意師古曰親臨遣之今以朕意曉告王孔子曰過而不改是謂過矣師古

曰論語載孔子之言也謂人有失行許以自新王其深惟孰思之無違朕意又

特以璽書賜王太后曰皇帝使諸吏宦者令承問東平

王太后朕有聞師古曰言母子不和也不欲指斥言之故云有聞也王太后少加

意焉夫福善之門莫美於和睦患咎之首莫大於內離

今東平王出緇祿之中而託于南面之位加以年齒方

剛○宋祁曰考諸本無位加字劉敞曰南面之文不具涉學日寡驚忽臣下師古曰驚

讀與不自宅於太后李奇曰不自宅者親之辭也師古曰言不自同宅人○宋祁曰注文

親字上疑以是之間能無失禮義者其惟聖人乎傳曰

父為子隱直在其中矣師古曰論語云葉公謂孔子曰吾黨有在躬者其父攘羊而子

證之孔子曰吾黨之直者異於是父為子隱子為父隱直在其中矣故引之也王太后明察此

意不可不詳閨門之內母子之間同氣異息骨肉之恩

豈可忽哉豈可忽哉昔周公戒伯禽曰故舊無大故則

不可棄也毋求備於一人師古曰市見論語言人有小惡當思其善不可責以備行

而即棄之也夫以故舊之恩猶忍小惡而况此乎已遣使者

諭王王既悔過服罪太后寬忍以貫之

師古曰貫猶緩也宋祁曰注未

當有也字

後宜不敢

師古曰言王於後當不敢更為非也

王太后強餐止思念

慎疾自愛字慙懼因使者頓首謝死罪願洒心自改

師古

曰洒音先弟反

詔書又勅傅相曰夫人之性皆有五常及其少

長耳目牽於耆欲

師古曰耆讀曰嗜

故五常銷而邪心作情亂

其性利勝其義

張晏曰性者所受而生也情者見物而動者也

而不失厥家者

未之有也今王富於春秋氣力勇武獲師傅之教淺加

以少所聞見自今以來非五經之正術敢以游獵非禮

道王者輒以名聞

師古曰道音導

宇立二十年元帝崩宇謂中

謁者信等曰漢大臣議天子少弱未能治天下以為我

知文法建欲使我輔佐天子

師古曰建謂立其議

我見尚書晨夜

極苦使我為之不能也今暑熱縣官年少

張晏曰不敢指斥成帝謂

之縣官也

持服恐無處所

如淳曰言不從道冀如昌邑王也

我危得之

孟康曰危

殆也我殆得為天子也師古曰危者猶今之言險不得之矣

比至下字凡三哭

張晏曰下

下棺也師古曰比音必寐反下音胡稼反

飲酒食肉妻妾不離側又姬胸臚

故親幸後疏遠

服虔曰胸音劬臚音奴溝反又音奴臍反

數歎息呼天宇聞

斥胸膈為家人子

師古曰黜其秩位

掃除永巷數笞擊之胸膈

私疏宇過失數令家告之宇覺知絞殺胸膈有司奏請

逮捕有詔削樊亢父二縣

師古曰音抗甫

後三歲天子詔有司

曰蓋聞仁以親親古之道也前東平王有闕

師古曰闕謂過失也

有司請廢朕不忍又請削朕不敢專

○宋祁曰削字下疑有地字

惟

王之至親未嘗忘於心今聞王改行自新尊修經術親

近仁人非法之求不以奸吏

師古曰奸音干

朕甚嘉焉傳不云

乎朝過夕改君子與之其復前所削縣如故

師古曰復音扶目反

後年來朝上疏求諸子及太史公書上以問大將軍王

鳳

○宋祁曰鳳字下當更有鳳字

對曰臣聞諸侯朝聘考文章正法度

非禮不言今東平王幸得來朝不思制節謹度以防危

失

師古曰危失謂失道而傾危也

而求諸書

○宋祁曰書字上當有子字

非朝聘之

義也諸子書或反經術非聖人或明鬼神信物怪

師古物

亦太史公書有戰國從橫權譎之謀漢興之初謀臣竒

策天官灾異地形阨塞皆不宜在諸侯王不可予不許之辭宜曰五經聖人所制萬事靡不畢載王審樂道傳

相皆儒者旦夕講誦足以正身虞意

師古曰虞與娛同

夫小辯

破義小道不通致遠恐泥皆不足以留意

師古曰論語稱孔子曰雖

小道必有可觀者焉致遠恐泥是以君子不為也泥謂陷滯不通也音乃細反

諸益於經術者

不愛於王

師古曰愛惜也於王無所惜之

對奏天子如鳳言遂不與立

三十三年薨

師古曰皇覽云東平思王家在無鹽人傳言王在國思歸京師後葬其家上松柏皆

西靡也

子煬王雲嗣哀帝時無鹽危山土自起覆草如馳

道狀又瓠山石轉立

晉灼曰漢注作報山山脇石一枚轉側起立高九尺六寸旁行一丈

廣四尺也師古曰報山山名也古作瓠字為其形似瓠耳晉說是也

雲及后謁自之石所

祭治石象瓠山

蘇林曰於宮中作山象
○宋祁曰作山象瓠山

立石束倍草并

祠之

師古曰倍草黃倍草也音步
賄反○劉敞曰立石屬上句

建平三年息夫躬孫

寵等共因幸臣董賢告之是時哀帝被疾多所惡事下

有司逮王后謁下獄驗治言使巫傅恭婢合歡等祠祭

詛祝上

如淳曰傅
恭巫姓字

為雲求為天子雲又與知災異者高

尚等指星宿言上疾必不愈雲當得天下石立宣帝起

之表也有司請誅王有詔廢徙房陵雲自殺謁棄市立

十七年國除元始元年王莽欲反哀帝政

師古曰改
其所為也

白

太皇太后立雲太子開明為東平王又立思王孫成都
為中山王開明立三年薨無子復立開明兄嚴鄉侯信
子匡為東平王奉開明後王莽居攝東郡太守翟義與
嚴鄉侯信謀舉兵誅莽立信為天子兵敗皆為莽所滅
中山哀王竟初元二年立為清河王三年徙中山以幼
少未之國建昭四年薨邸葬杜陵

○宋祁曰江南本邸
字上有邸字折本無

無子絕太后歸居外家戎氏

孝元皇帝三男王皇后生孝成帝傅昭儀生定陶共王

康

師古曰共讀曰恭

馮昭儀生中山孝王興

定陶共王康永光三年

○宋祁曰一本作元光三年

立為濟陽王六

年徙為山陽王八年徙定陶王少而愛

師古曰言少小即為帝所愛

長多材藝習知音聲上竒器之母昭儀又幸幾代皇后

太子

師古曰幾音鉅依反

語在元后及史丹傳成帝即位緣先帝

意厚遇異於它王十九年薨子欣嗣十五年成帝無子

徵入為皇太子上以太子奉大宗後不得顧私親乃立

楚思王子景為定陶王奉共王後成帝崩太子即位是

為孝哀帝即位二年追尊共王為共皇帝置寢廟京師

序昭穆儀如孝元帝

如淳曰恭王元帝子也為廟京師列昭穆之次如元帝言如天子之

儀徙定陶王景為信都王云

如淳曰不復為定陶王立後者哀帝自以已為後故

中山孝王興建昭二年王為信都王

○劉敞曰王為信都王上王字當作

立字十四年徙中山成帝之議立太子也御史大夫孔光

以為尚書有殷及王兄終弟及

師古曰謂兄死以弟代立非父子相繼故言及

中山王元帝之子宜為後成帝以中山王不材又兄弟

不得相入廟

○宋祁曰入字上常有繼字

外家王氏與趙昭儀皆欲

用哀帝為太子故遂立焉上乃封孝王舅馮參為宜鄉

侯而益封孝王萬戶以尉其意三十年薨子衍嗣

師古曰諸

侯王表云中山孝王薨綏和二年王箕子嗣而元始二年詔云皇帝二名通于器物今更名合於古制是則嗣位之時名為箕子未諱衍也今此傳云子衍嗣蓋史家追書之也○宋祁曰浙本注文元始字上有平紀字

七年哀帝崩無子徵中山王衍入即位是為平帝太皇太后以帝為成帝後故立東平思王孫桃鄉頃侯子成都為中山王奉孝王後王莽時絕

贊曰孝元之後徧有天下

師古曰孝元之子孫徧得為天子也徧即古遍字

然

而世絕於孫豈非天哉淮陽憲王於時諸侯為聰察矣

張博誘之幾陷無道

師古曰幾音鉅依反

詩云貪人敗類

師古曰大雅蕩

之詩也類善也言貪惡之人不可冒近則敗善也

古今一也

前漢書卷八十

前漢書卷八十考證

楚孝王卬傳子懷王文○按文表作芳

東平思王宇傳上於是遣太中大夫張子矯注師古曰

矯字或作僑○臣召南按藝文志及劉向玉褒傳並

作僑則僑字是也

毋念爾祖述修厥德○今詩作聿修即漢書他傳亦作
聿修惟此文作述或齊魯韓三家所傳不同耳

無鹽危山土自起覆草如馳道狀○息夫躬傳作無鹽

危山有石自立開道與此稍異

贊詩云貪人敗類注師古曰大雅蕩之詩也○顧炎武
曰大雅桑柔之詩師古誤以爲蕩

前漢書卷八十考證